



Senin, 30 September 2024

Ogen: Perb.Rasul 20:32-35



"Malemen Ate Mere"



Hubungan perbulangen ras ndehara ikataken sehat adi duana nggit erdahin, sisampat-sampaten ras sikelengen. Komunikasina duana mehuli bage pe komunikasina ku Tuhan duana mehuli. Perbulangen ras ndehara si mehuli *'tidak saling menuntut tetapi saling memberi.'* Bagi siikataken Paulus man pertua-pertua i Epesus tupung acara perpisahenna. Nina Paulus, la pernah aku ersura-sura gelah ibereken emas, entah pirak bage pe uis si mejile. Arah tanku erdahin aku guna keperluan geluhku. Janah ulih pendahiku e banci ka aku nampati kalak musil. Maksud Paulus e, ula min meriahen siakap ngalo saja arah kalak sideban. Adi man perbulangen ndehara, ula min lalap kita terjeng ibere. Rusalah duana pasangan e gelah mere. E maka kataken Paulus, *'malemen kap ate i bas mere asangkan i bas ngalo.'* Adi bage perbulangen ukurina rusur kai si perluken ndehara, kai si banci ku bereken man ndeharaku. Sebaliknya, ndehara pe ukurina rusur kai si mehuli si banci iberekenna man perbulangenna. Tupung duana ia ngukuri ras ngelakoken si mehuli man pasangenna, i je me ijumpaina kemalemen ate. Pengajaren Paulus pe man banta, kita arus mejingkat erdahin guna nampati kalak musil. Enda pendilo ku bas perjabun kalak Kristen. I bas kita erdahin, la terjeng ngukuri ras encukupi keperluan jabunta ngenca, tapi ulih pendahinnta e pe banci nampati kalak si man sampaten. Enggo terbagesen pengajaren e man banta, maka jabunta arusna jadi pasu-pasu man kalak sideban. I bas kita jadi pasu-pasu e situhuna i je me kemalemen ate e. Nina sekalak teolog Kristen, labo pagi isungkun Tuhan piga motorndu, entah rumah kontrakenndu, entah uga belangna jumandu. Tapi, piga kalak si enggo isampatindu? I bas kita nampati, i je ka me Tuhan nampati kita ras isi jabunta.